

佩文齋廣羣芳譜卷第七

穀譜

麥

按大麥小麥統名曰麥原譜尚以小麥爲麥而另列大麥于後今從齊民要術併合爲一

釋說文麥芒穀秋種厚埋故謂之麥麥野金王而生

火王而死

原

小麥一名來

又作稊爾雅云小麥稊廣雅云來小麥也本草云麥

字從來從夊來象其實夊象其根

苗生如韭成似稻高二三尺實居殼

中芒生殼上生青熟黃秋種夏熟具四時中和之氣兼

寒熱溫涼之性繼絕續乏爲利甚普故爲五穀之貴亦

可春種至夏便收然不及秋種者性有南北之異北地

燥冬多雪春少雨麥晝花薄皮多麪食之宜人南方卑

濕冬無雪春多雨麥受卑濕之氣又夜花食之生熱腹

痛難消亦地氣使然也北麥固佳陳者更良

增廣志

鹵水麥

其實大麥形有縫

稅麥

似大麥出京州

旋麥

三月種八月熟出西方

赤小

麥

赤而肥稀熟出鄭縣

山提小麥

至黏弱以貢御

半夏小麥秃芒麥

齊民要術

云按今世有落麥者秃芒是也

原大麥

一名牟

又作麴爾雅云大麥薺廣雅云牟大麥也

本草云麥之苗粒皆大於來故得大名牟亦大也或又作麥班固典引云玄種黃麥之事是也

莖葉與

小麥相似但莖微麤葉微大色深青而外如白粉芒長

殼與粒相黏未易脫小麥磨麴作餅餌食大麥止堪碾

米作粥飯及喂馬用此其所異也性平涼滑膩作飯寬

中下氣煑粥甚滑磨麴作醬甚甘美春秋皆可種他如

穠麥

本草李時珍云穠麥有二種一種類小麥而大一

種類大麥而大又云是大麥中一種皮厚而色青者也唐蕭炳云西川人種食之山東河北人正月種之名曰春穠形狀與大麥相似陳承云作麴脆硬食多脹

人汴洛河北之廣志云有赤赤麥本草陳藏器

問又呼爲黃稞麥赤色而肥青稞麥云青稞似大

麥天生皮肉相離秦隴巴西種之王禎農書云青稞有

大小二種似大小麥而粒大皮薄多麩無麩西人種之

黑穰麥見廣志大抵與大麥一類而異種增廣志稷麥

出京州本草糯麥大麥有黏者名

似大麥詩鄘風爰采麥矣沫之北矣增鄘風我行其

野芄芃其麥增周頌貽我來牟帝命率育箋武王渡

孟津白魚躍入舟出涘以燎後五日火流爲烏五至以

穀俱來此謂貽我來牟疏穀蓋牟麥也原周頌於皇

來牟將受厥明明昭上帝迄用康年增禮記王制夏

薦麥月令孟春之月雪霜大摯首種不入蔡邕章句

太陰干陽雨雪而霜故大傷首種首種謂宿麥也麥以

秋種故謂之首種季春之月天子乃爲麥祈實註於

含秀求其成也孟夏之月農乃登麥天子乃以彘嘗

麥先薦寢廟註麥之新氣尤盛以彘食之散其熱也

麥秋至仲秋之月乃勸種麥無或失時註麥者接絕

續乏之穀尤重之疏前年秋穀至夏絕盡後年秋穀夏

時未登是其絕也夏時人民糧食闕短是其乏也麥乃

夏時而熟是接其絕續其乏也內則麥食脯羹雞羹

疏謂以麥爲飯析脯爲羹又以雞爲羹三者味相宜也

周禮天官雁宜麥疏雁宜麥者雁味甘平大麥味酸

而溫小麥味甘微寒氣味相成故云雁宜麥原左傳

隱公三年夏四月鄭祭足帥師取溫之麥孟子今夫

麤麥播種而耨之其地同樹之時又同淳然而生至於
日至之時皆熟矣〔家語〕宓子賤爲單父宰齊攻魯道
由單父單父父老請曰麥已熟矣今齊寇至不及人人
自收其麥請放民皆使出穫麥可以益糧且不資寇三
請而宓子賤不聽俄而齊寇逮乎麥季孫聞之怒使人
讓曰民寒耕熟芸曾不得食可不哀哉猶可有告而不
聽非所以也宓子賤蹇然曰今茲無麥明年可樹若使
不耕者得穫是使民樂有寇也且單父得一歲之麥於
魯不加強喪之不加弱使民有自取之心其創必數世
不息季孫聞之赧然媿曰地若可入吾豈忍見宓子哉

前漢書食貨志董仲舒說上曰春秋他穀不書至

於麥禾不成則書之以此見聖人於五穀最重麥與禾也今關中俗不好種麥是歲失春秋之所重而損生民之具也願陛下幸詔大司農使關中民益種宿麥令母後時〔註〕師古曰宿麥謂其苗經冬〔後漢書光武本紀〕詔曰久旱傷麥秋種未下朕甚憂之〔原〕〔後漢書馮異〕

傳光武至南宮大風雨引車入道傍空舍馮異抱薪鄧禹爇火光武對竈燎衣異進麥飯〔逸民傳〕高鳳少爲

書生家以農畝爲業專精誦讀晝夜不息妻嘗之田曝麥於庭令鳳護雞時天暴雨鳳持竿誦經不覺潦水流麥妻還怪問鳳方悟之後遂爲名儒〔增〕〔晉書孝友傳〕

王裒家貧躬耕計口而田度身而蠶或有助之者不聽

諸生密爲刈麥哀遂棄之 庾袞母終服喪居于墓側
歲大饑藜羹不糝門人欲進飯者而袞每日已食莫敢
爲設及麥熟穫者已畢而採摭尙多袞乃引其羣子以
退曰待其間及其摭也不曲行不旁掇跪而把之則亦
大獲 〔魏書〕樊子鵠傳子鵠除殷州刺史屬歲旱儉子
鵠恐民流亡乃勒有粟之家分貸貧者并遣人牛易力
多種二麥州內以此獲安 〔釋老志〕東萊人王道翼少

有絕俗之志隱韓信山四十餘年斷粟食麥 〔隋書〕隱
逸傳張文詡河東人也每以德化人鄉黨頗移風俗嘗
有人夜中竊刈其麥者見而避之盜因感悟棄麥而謝
文詡慰諭之自誓不言因令持去經數年盜者向鄉人

說之始爲遠近所悉

〔南史吳明徹傳〕明徹有粟麥三

千餘斛而鄰里饑餒乃白諸兄與鄉里計口平分同其

豐儉賴以存者甚衆

〔孝義傳〕沈崇僚母卒葬後更行

服三年久食麥屑不噉鹽酢

〔舊唐書高宗本紀〕儀鳳

三年五月幸九成宮秋七月宴近臣諸親於咸亨殿上

謂霍王元軌曰去冬無雪今春少雨自避暑此宮甘雨

頻降夏麥豐熟秋稼滋榮

〔玄宗本紀〕上自於苑中種

麥率皇太子已下躬自收穫謂太子等曰此將薦宗廟

是以躬親亦欲令汝等知稼穡之難也因分賜侍臣謂

曰比歲令人巡檢苗稼所對多不實故自種植以觀其

成且春秋書麥禾豈非古人所重也

〔五代史回鶻傳〕

同鴈地宜白麥青麥麴麥 〔宋史仁宗本紀〕天聖三年

四月癸巳幸御莊觀刈麥聞民舍機杼聲賜織婦茶帛

〔禮志〕太宗景祐三年禮官宗正請每歲夏孟月嘗麥

配以毚 皇祐五年後苑寶政殿刈麥謂輔臣曰朕新

作此殿不欲植花歲以種麥庶知穡事不易也自是幸

觀穀麥惟就後苑 〔汲冢周書〕維四年孟夏王初祈禱

於宗廟乃嘗麥於太祖 〔穆天子傳〕天子西征至于赤

烏之人獻稌麥百載天子西征至于鸚韓氏爰有樂野

溫和稌麥之所草 黑水之阿爰有野麥 〔師曠禽經〕

澤雉啼而麥齊 〔原〕莊子青青之麥生於陵陂 〔繪〕呂

氏春秋今茲美菜來茲美麥 孟夏之昔殺三葉而獲

大麥〔註〕昔終也三葉薺芄也薺莢也見三葉之死則大麥可獲之候也〔淮南子〕濟水通和而宜麥

春秋佐助期麥神名福習〔春秋說題辭〕麥之爲言殖

也寢生觸凍而不息精射刺直故麥含芒事且立也

〔說文〕薺周所受來牟也一麥二牟象其芒刺之形天所

來也〔獨斷〕老扈氏農正趣民收麥〔原〕曹瞞傳太祖

嘗出軍行經麥中令士卒無敗麥犯者死騎士皆下馬

付麥相持於時太祖馬騰入麥中勅主簿議罪主簿對

以春秋之義罰不加於尊太祖曰制法而自犯之何以

帥下然孤爲軍帥不可殺請自刑因拔劍割髮以置地

〔諸葛恪別傳〕孫權饗蜀使費禕禕停食餅索筆作麥

賦恪亦請筆作磨賦咸稱善焉



秦子孔文舉爲北

海相有母病思食新麥家無乃盜鄰熟麥而進之文舉

聞之特賞曰不必來謝但勿盜也盜而不罪者以爲勤

於母也

博物志

漢武帝時廣陽縣雨麥

五土所宜

黑壤宜麥黍

玄晏春秋

衛倫過予言及於味稱魏故

侍中劉子陽食餅知鹽生精味之至也予曰師曠識勞

薪易牙別淄澠子陽今之妙也定之何難倫因命僕取

糧糗以進予曰麥也有杏李柰味三果之熟也不同于

焉得兼之倫笑而不荅退告人曰士安之識過劉氏吾

將來家實多故杏時將發糒以杏汁李柰將發又糒以

李柰汁故兼三味

陳留耆舊傳高式至孝永平中蠅

蝗爲災獨不食式麥

〔西域諸國志〕天竺十一月六日

爲冬至則麥禾十二月十六日爲臘則麥熟

〔拾遺記〕

樂浪之東有背明之國其國昏昏常暗宜種百穀名曰融澤方三千里五穀皆良食之後天而死有延精麥延壽益氣有昆和麥調暢六府有輕心麥食者體輕有醇和麥爲麴以釀酒一醉累月食之凌冬可袒有含露麥穗中有露味甘如飴 張華爲九醞酒以三薇漬麴蘖蘖出西羌麴出北方北方有指星麥四月火星出麥熟而穫之蘖用水漬麥三夕而萌芽平旦雞鳴而用之俗人呼爲雞鳴麥以之釀酒醇美久含令人齒動若大醉不叫笑搖蕩令人肝腸消爛俗人謂爲消腸酒

〔晉中〕

興書苻健洪第三子健陰圖關中陽使其徒種麥示無
西意〔水經註〕汶水入萊蕪谷出谷有平丘面山傍水
土人悉以種麥云此丘不宜植稷黍而宜麥齊人相承
以植之〔國史補〕竇氏子言家方盛時有奴厚歛羣從
數宅之資供白麥麪醫云白麪性平由是恣食不疑凡
數歲未嘗生疾其後有奴告其謬妄所輸麪乃常麥非
白麥也羣從諸宅一時暴熱皆發〔原〕杜陽雜編元和

八年大軫國貢碧麥形大於中華之麥表裏皆碧香氣
如粳米食之體輕可以禦風〔增〕孔帖同昌公主出降

賜金麥銀米共數斛此皆條枝國獻高昌土沃麥皆

再熟〔東坡集〕江湖間有鳥鳴於四五月其聲若云麥

熟卽快今年二麥如雲此鳥不妄言也

原東坡詩註

今大內當麥熟時以黃羅帕封賜百官其外題曰麩或云以蜜漬食尤佳

增

朱子詩註小說人有中麥毒者

夢紅裳娘子悲歌有一丸蘆菔火吾宮之句

空同子

麥種之秋而焦於夏火尅金也麥穗直而芒有兵象焉

湧幢小品

洪武初一儒赴召太祖問曰習何經曰業

農太祖曰汝知麥禾之節不同乎對曰禾三節麥四節

禾播種於春至秋而穫凡歷三時故三節麥則歷四時

始成故四節太祖曰是能知稼穡者卽擢某州知州

木蘭國有三寸之麥

原

梧潯雜佩南方四月雨後尙

有餘寒土人謂之麥秀寒按王勃採蓮賦麥雨微涼又

徐陵集亦有麥冷之語

傳原

宋

蘇軾溫陶君傳石中美字信美中牟人也

本姓麥氏隨母羅氏去其夫而適石因冒其姓始中美之生也其父太卜氏以連山筮之遇師䷗之爻是謂師之革䷰曰生乎土成乎水而變乎火坎以輶之坤以布之釜以熟之口以內之腹以藏之美在其中而暢於四支能者樂之以爲大腹不能者傷之以爲心病衆所說也善莫大焉故因以名字之中美幼輕躁踈散與物不合得其鄉人儲子之意因使從澄水湯先生游旣熟遂陶而成之爲人白皙而長溫厚柔忍在諸石中最有名儲子因秦故司馬錯李斯子由趙高閭樂並薦於秦王

得與市田蔡甲肥鄉羊奭內黃韓音子俱召見是時王
方省覽文書日昃未食見之甚喜曰卿等向者安在何
相見之晚耶未見君子怒如調饑卿等之謂也自是皆
得進見克上心腹賜爵土更上食典御旦夕召對所獻
納時或麤疎上未嘗不盡善也秦王以嫪毐事出文信
侯而遷太后怒恚數日不食中美乘機進諫上說賜爵
徹侯食溫定陶二縣號溫陶君中美旣被任用凡有造
作自丞相以下莫不是之其爲人柔和有以塞讒人之
口故也他日秦王坐朝日旰意有所思亟召中美將虛
以納之中美不熟計以進其說頗剛鯁志不快之者累
日有博士單軫說上曰爲其所傷矣宜有以下之卽無

患因進其弟子已升元華於上上意稍平然自是遂疎
中美不得爲尙食矣中美曰吾爲尙食日夕自謂不素
餐者今吾與牟生輩皆不得進縱復有用者將誅辱乎
昔也得克心腹而今也遽不信是有不善我之心雖使
時或思我彼將不盡矣遂稱疾以侯就第其後子孫生
郡郭者散居四方自號渾氏扈氏索氏石氏爲四族云
文賦散句**原**殷箕子麥秀歌麥秀漸漸兮彼黍離離
漢枚乘七發麥秀漸兮雉朝飛 **增**魏黃觀疏今年麥
苗雖好臨熟多雨而悉復偃壞小麥畧盡惟穰麥大麥
頗得半收耳 **原**晉潘岳射雉賦麥漸漸以擢芒

五言古詩

增

唐白居易觀刈麥田家少閒月五月人倍